

ILUARSISSUT

Immikkoortup taaguutaa/qulequtaa allangortinneqarpoq teknikkikkut iluarsineqarneranik pissuteqartumik, taamaalilluni aalajangiiffigisassatut siunnersuutip oqaasertai erseqqinnerulerlutik.

Inatsisartut suleriaasianni § 33 naapertorlugu matumuuna Naalackersuisut aalajangiiffigisassatut siunnersuummik imaattumik saqqummiussaqrput:

Danskit naalagaaffianni innuttaasut il.il. passitaarnerannik inatsisip aamma nunat allamiut pillugit inatsisip allangortinneqarneranik inatsisip nr. 613, 14. juni 2011-meersup § 1-iata (passini il.il. pussuit ipaasiorneri) ilaannakortumik Kalaallit Nunaanni atuutilersinnissaanut Namminersorlutik Oqartussat oqaaseqaateqarnissaanik Inatsisartut aalajangiiffigisassaattut siunnersuut
(Nunamut Namminermut, Pinngortitamut Avatangiisinullu Naalackersuisoq)

Saqqummiussissut

(Nunamut Namminermut, Pinngortitamut Avatangiisinullu Naalackersuisoq)

Siullermeerneqarnera

Danskit naalagaaffianni innuttaasut il.il. passitaarnerannik inatsisip aamma nunat allamiut pillugit inatsisip allangortinneqarnerannik inatsimmi nr. 613-mi, 14. juni 2011-meersumi § 4, imm. 2-p peqqussummut siunnersuutip atuutsilersinneqarnissaanut noqqaassut Justitsministeriaqarfimmiit Naalackersuisut tiguaat.

Siunnersuut aamma Justitsministeriaqarfiup siunnersuummut tunngatillugu allakkiaa Inatsisartunut agguanneqartut innersuussutigissavakka.

Juunip aallaqqaataani 2011-imiilli Danmarkimi passitaarnermut atatillugu pussuit ipaasa qarasaasiamut immiunneqarnerannut 25 kr.-inik sullissinermut akiliuteqartoqartalerpoq.

Peqqussutissatut siunnersuummi siunertarineqarpoq nunami maani, soorlu Danmarkimi taamaattoq, sullissinermut aningaasartuutitut matusissutissanik akiliuteqartitsisoqartalernissaata inatsimmik tunngavissaqartinneqalernissaa.

Passinik tunniussisarneq naalagaaffiup susassaqarfigimmagu inuup pisataanik kinaassusersiuutit passinut ilanngunneqartartut passip naalagaaffiup suani tunniunneqarnera apeqqutaatinnagu assigiittariaqarput.

Taamaalilluni inatsisip nr. 613-ip 14. juni 2011-imersup sullissinermut akiliuteqartarnissamik aalajangersakkamik imaqartup Savalimmiunut Kalaallit Nunaannullu atuutilersinneratigut passini tamani 1. januar 2012-ip kingorna passimik piginnittup kiinaata assinganik qarasaasiakkut immiunneqartumik aamma passimik piginnittup pussuisa ipaasa qarasaasiamut immiunneqartunik passip chipianut toqqorsisarnissat kiisalu pussuit ipaasa qarasaasiamut immiunnerannut sullissinermut akiliummik aningaasartuutit tunngavigalugit annertussusilikkamik akitsuummik akiliutaareersup saniatigut ilassummik 25 kr.-inik sullissinermut akiliuteqartarnissaq qulakkeerneqassapput.

Malugineqassaaq taamaaliornikkut akiliutit pillugit naalagaaffimmi tamakkiisumik assigiissaarineq anguneqassanngimmat. Tassani inersimasut passiinut akiliutip 400 kr.-iniit 600 kr.-inut qaffariaataa, eqqartuussivimmut akitsuummumut inatsisip passinullu inatsisip allannguutaat inatsimmi nr. 1103-mi 29. december 1999-imeersumi § 2-kkut aalajangersarneqartoq Savalimmiunut Kalaallit Nunaannullu atuutilersinneqannginnerat pissutaavoq.

Naalackersuisut sinnerlugit inassutigissavara Namminersorlutik Oqartussat peqqussutissaq akuerineqassasoq taamaalillunilu sapinngisamik piaartumik inatsisip allannguutaata atuutilernissaa pillugu Justitsministeeriaqarfiup nalunaarfigineqarnissaa Inatsisartut isumaqatigigaat.

Taamatut oqaaseqarlunga Naalackersuisut sinnerlugit siunnersuut Inatsisartunut akuersortumik suliaassanngortippara.